

**Inuussutissarsiutinik ilinniartitsinerit aamma inuutissarsiutinik ilinniartitsinerup iluani
pikkorissarnerit pillugit Inatsisartut inatsisissaattut siunnersuut**

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
ataatsimiititaliap**

ISUMALIUTISSIISSUTAA

Siunnersuutip aappassaaneerreqarnissaanut saqqummiunneqartoq

Kultureqarnermut, Ilageeqarnermut, Ilisimatusarnermut Ilageeqarnermullu ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq, Debora Kleist
Inatsisartunut ilaasortaq, Harald Bianco
Inatsisartunut ilaasortaq, Andreas Uldum
Inatsisartunut ilaasortaq, Malik Berthelsen
Inatsisartunut ilaasortaq, Knud Kristiansen

Ataatsimiititaliap siunnersuummik siullermeerinnineq tunngavigalugu siunnersuut manna misissorpaa.

Siunnersuutip imarisaa

Naalackersuisut siunnersuuteqarnermikkut kissaatigaat unamminartut annertuut nunatsinni inuiaqatigiit inuutissarsiutit nutaarpasuit suliniutillu annertoorujussuit pilernerisigut unammilligassariligaat naaperiarnisaat. Taamaattumik ilinniartitaaneq pillugu suliniuteqarnerup nukittorsarneqarnissaa anguniarneqarpoq pingaarnertullu anguniagaavoq sulisorisat 2/3-iisa 2020-imi ilinniagaqarsimasuulernissaat tamanna nunatsinni inuiaqatigiit atorfissaqartimassuk.

Aqutsinermit aqqissuussinermik nutaamik siunnersuuteqarnermi qitiusumik ilinniarfiit siunissami unamminartunut pisariaqartunik sakkussissavai. Tamatuma saniatigut aqutsinermik aqqissuussinerup nutaap qitiusumik ilinniarfiit qaqugukkulluunniit ilinniakkanik naapertuuttunik suliamullu atatillugu pitsaalluinnartunik neqeroorsinnaanissaat sinaakkusissavaa. Tamanna tunuliaqutaralugu ilusiliussassaq qitiusumik ilinniarfiit ataasiakkaat imminnut aqutarinerunissaannik aallaaveqartoq siunnersuutigineqarpoq. Ilusiliussamut ilaapput suliasat suliarinissaannut naleqqiullugu annertunerusumik kiffaanngissuseqarneq, aamma akisussaaffiup annertunerusup tunniunneqarnera, taamaalilluni qitiusumik ilinniarfiit tamatuma kingorna tassaalissallutik suliffeqarfiit pisortat pigisaat namminersortut. Suliffeqarfiit qullersaasunik aqunneqarneri siulersuisunit, suliamik immikkut ilisimasalinnik, suliffissaqartitsinermilu kattuffinnit toqqarneqartunik ingerlanneqassapput. Tamatuma saniatigut qitiusumik ilinniarfiit suliasanik erseqqinnerusutigut isumaginninneri, siulersuisut Namminersorlutillu Oqartussat akornanni angusaqarnissamik isumaqatigiissutit aqutugalugit malittarisassiuunneqassasat siunnersuutigineqarpoq.

Siunnersuutip Inatsisartuni siullermeerneqarnera

Partiit tamarmiusut siunnersuummut tapersersuipput.

**Kultureqarnermut, Ilinniartitaanermut, Ilisimatusarnermut Ilageeqarnermullu
ataatsimiititaliap siunnersuummik suliarinninnera**

Tusarniaaneq

Siunnersuut ulluni 5. maj-imiit 4. juni-mut 2008 tusarniaassutigineqarpoq. Tusarniaanermi akissutigineqartunut attuumassuteqartumik siunnersuummut oqaaseqaatinik pitsaasumik suliaqartoqarsimanagera taakkulu siunnersuummut attuumassuteqarnerat takuneqarsinnaammat Ataatsimiititaliamit maluginiarneqarpoq.

Ataatsimiititaliap siunnersuummik suliarinninneranut atatillugu pissutsit arlallit Naalakkersuisunut Ataatsimiititaliamiit itisileqquneqarput. Ataatsimiititaliap apeqquai kiisalu Naalakkersuisut akissutaat ilanngussa 1-imi takuneqarsinnaapput.

Naalakkersuisut akissutaannut Ataatsimiititaliaq qujassuteqarpoq tusaatissatullu tiguneqarpoq. Qitiusumik ilinniartit siulersuisuinut akissarsiaqartitsineq kiisalu aningaasartuutitut ajunngitsorsiasaqartitsineq pillugu Naalakkersuisut akissuteqaatiminnut atatillugu nalunaarummut missingiusiamik nassiusaqarput. Nalunaarutissatut missingiusiaq Isumaliutissiissummi ilanngussa 2-itut aammattaaq ilanngunneqarpoq. Tassunga atatillugu erseqqissarneqasaaq missingiusiaq pineqartoq sulit tusarniaassutigineqarsimanngimmat.

Inassuteqaat

Qulaani allasimasut kiisalu siunnersuutit siullermeerneqarnerani oqaaseqaatigineqartut tunngavigalugit **Ataatsimiititaliap isumaqatigiittup** siunnersuut **akuersissutigineqassasoq** inassutigaa.

Taama oqaaseqaateqarluni Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap siunnersuut Inatsisartunut aappassaaniigassanngortippaa

Harald Bianco

Debora Kleist

Andreas Uldum

Malik Berthelsen

Knud Kristiansen